

四庫全書

集部

欽定四庫全書

少室山房集卷五十六

明 胡應麟 撰

七言律詩七十四首

壽貞吉王孫太夫人七秩并寄蒂斯孔暘

婺女寒芒接豫章
天孫雲錦落持觴
金芝百本來西極
玉樹三株耀北堂
紫鳳夜含靈笈舞
蒼虬晨逐素書翔
窺簾敢作偷桃客
願借天厨一臠嘗

題希夷高臥圖奉壽郭泰和封翁大參知相奎
尊人也時年七秩

躡蹻置風度十洲一筇長嘯華山頭神遊欲盡三千界

夢斷俄驚八百秋絳闕徵書迴紫鳳

圖南表文

丹臺靈笈駐

青牛

函谷華山密通

龍光忽照匡廬下重遣蒲輪出帝州

壽舒封翁七秩二首

壽域晴開傍海隅安期雙鳥漸凌虛秋明南極三天上
夜燕西池萬里餘鶴筭定知同綺皓扁舟寧假問陶朱

虛疑卓氏臨邛盛次第黃封照里閭

青雀西來瑞氣濃方塘秋色照芙蓉華陽是處傳丹錄
渭水何人敵素封桂樹堦庭巢六鶴棣華天闕近雙龍
翩翩叔寶今華髮尚記東床臥日容

題趙汝元白雲莊

岌崑飛磴入林丘天際遙看漱水流青壁祇疑人世斷
白雲何羨帝鄉遊茆簷上月千花暝草閣吟風萬樹秋
聞道生徒多受業蓼莪篇廢定誰酬

顏廷愉過訪有贈時廷愉將之都下因寄諸友
片帆風雨泊孤城一刺龍門曳履迎閭闔平原推世德
詩篇光祿擅才名風期乍擁衰顏壯雪色頻扶病眼明
多謝酒人燕市上竹林吾已負生平

贈宋化卿

廿載錢塘悵獨遊風塵何意片言酬嚴城畫角雙鴻下
客舍清燈駟馬留賦就幾人春雪和篇成何處夜珠投
明朝爛漫湖頭約十里桃花照畫樓

送蘇君禹觀察之嶺右八首

握手衡門思欲狂相逢如夢在河梁
三年素札咸陽斷十日青尊潑水長
絕塞風雲懸馬首大荒岐路出羊腸

因君一問龍標尉明月梅花遍夜郎

青蓮詩我寄愁心與明月隨風直到

夜郎西嶺右與接壤故云

極目遐荒共黯然蒼梧何處問樓船
天窮象郡千峰外地隱龍城六洞前
飛詔金門頻計日傳書銅柱易經年
無勞更閱河東記海色黃溪晝夜懸

桂林隱山有六洞見吳武陵記黃溪

詳子
厚文

萬里褰帷涉瘴氛炎州風物向來聞
羅池翠羽多充賦
林邑鮫珠競購文
豈堪飛花園似雪
枕柳垂葉路如雲
伏波祠廟經行處
一奠椒漿桂水濱

腰下雙懸玉鹿盧
拂天雄劍倚昆吾
褰帷霧洗三苗窟
露冕霜飛百粵途
荔子尚祠遷客否
蕉花能憶美人無

七星岩畔題詩過
羨殺朱幡在畫圖

韓詩荔子升分蕉
黃見羅池廟碑闕

中有美人蕉
故頸聯云

錦席孤飛散曙鴉如椽雙筆氣凌霞遐荒詞賦傳中國
絕徼文章配大家灘水瘴雲行駐節鬱林奇石坐當衙
紅潮醉頰檳榔熟努力朝餐望裡加

文章謂
柳州也

萬山行盡見牂牁處處椰漿酌叵羅赤日猩鼯啼古洞
青天龍蜃出層波風生羽節炎威靜露洗牙旗瘴色和
好作刺桐花下客細吹蘆笛聽夷歌

雙旌行色暮蕭蕭天地西南問沅寥姓字始興懸竹帛
功名新息樹銅標滕江水溢青蘿近荔峒嵐深翠障遙

珍重大廷恩綵筆看君六翮上層霄

昌黎送人之嶺右云江作青羅帶山

如碧

玉簪

煥爛新除下玉宸聊從殊域試經綸傳書已見迴周史

諭檄能無待漢臣夜月三花流皂蓋朝霞八桂上朱輪

玄亭咫尺堪誰守一盼東陽問字人

君禹自關中返登崧岳賦詩寄余尾

句謂李生允達嘗受知也

戊子之秋與君禹督學晤武林時方病瘡僅

僅數語別去已丑春余自夏村歸適君禹擢

關中前發閱月矣秦越茫然邈不聞問比余
居先宜人憂夜分車騎過從則君禹再擢嶺
右中途不通一刺特為余艤棹蘭陰感舊論
心達旦忘寐申言餞別成詩八章嶺右山川
秀甲寓內君禹茲行神與俱往矣

夜泊金閭寄莫王敬美先生八首

有序

不佞卅歲遊燕則次公以年家見知凡竿牘
下詢家君齒及不佞亡慮十數顧不佞未嘗

識面也丙子秋次公以參知赴江右過訪蘭
陰邂逅蓬萊片語投合杯酒揚扈形骸頓忘
爾後不佞拏舟間闔者四次公停車澌水者
三每一把臂輒潦倒淋漓濡首廼別比次公
入南都不聞問幾半載詢諸吳中則報次公
逝矣是秋北上極意酹酒婁江少致國士之
感適病中憤憤不及遄赴爰賦七言八律以
代奠章

明時何客並登壇宇宙文章屬二難大海雲霞麟鳳出

鳳麟洲在海中

中途風雨鵲鷁寒三天謁帝更容髻八極游神

快羽翰不遠桃花瑤水上飛書無路問青鸞

白面含香上紫宸前身曾是石麒麟天容作賦遊闕洛

公有闕洛紀遊諸稿

帝遣傳經到越閩

次公嘗督學二方

飛蓋西園饒和

客曳裾南國盡才人重來欲話當年事落日山陽笛滿
隣

飛詔頻年下赤霄故園薇蕨興偏饒高風突兀迴三代

大業熒煌擅九朝禮樂夔龍元事舜

敬美為禮官耕耘有蘭省等集

巢許亦逃堯

所居草堂名澹圃有田可耕

莫言遺冢臯橋畔
古人

傳玉樹標

仙游何處白雲鄉
絳節飄颻上帝傍
五葉世傳中
令貴
三朝誰識次公狂
丹青永夜悲前席
絲竹頻年醉後堂
茗椀酒鎗渾似昨
不堪重過綠蘿庄

環珮當年碣石臺
一時才子盛追陪
銓懸太乙人初聚
漏盡長楊客未迴
楚澤悲風迷屈宋
梁園殘雪散鄒枚

龍門咫尺無窮恨誰共登樓賦七哀

年纔四十五游成昏嫁何須畢尚平泰華兩登天地小
崧衡齊躡斗牛驚九疑峰憶帆前墮三疊泉猶杖底鳴
瓢笠王郎今在否朝騎鸞鶴上瑤京

次公於名山惟北岳未登餘四岳外

太和匡廬武夷皆杖履所歷具名山遊記中

抗手吳門歲月除三年秋色斷鱸魚清江一曲題詩外
大海千峰入夢餘紫氣尚懸朱雀桁丹霞長擁白牛車
何因一問梯仙道並捧金璫拜玉除

短褐長安記昔遊
忘年傾蓋見君侯
淮陰敢竊無雙譽
江左元推第一流
吟盡白雲鵲鵲觀
坐殘紅日鳳皇樓
蕭條往事空華髮
落木淒風遍海頭

賦八詩後鄙懷不能已
已伏枕呻吟再成八律
共前什計十六章
輒命使者焚之
几筵次公
有靈當為我擊節
三神之頂浮一大白也

中年真訣至人傳
晚歲仍參佛祖禪
夜雪尚疑中岳頂
朝霞俄赴大羅前
黃金闕近雙龍駐
白玉樓高萬象懸

為問仙都題記者幾家詞筆並如椽

才名伯仲世爭奇並握隋和照海濱大野正看儀鳳日
荒郊俄遇泣麀時惟應翰墨留千載盛有文章落四夷
燐燐雞林傳賞遍懸金寧俟國門知

作賦東南見大夫平將彩筆擅菰蘆青衿問字環三省
白幘傳詩盡五湖遼海客歸應化鶴緱山人去定飛鳬
天瓢萬斛金莖滿肯憶黃公舊酒壚

綽約仙山大海東神人何事暫乘風栽花已見潘安似

擲果將無衛玠同八座朝霞明遠岫披襟寒月挂長空
屋梁此夜看顏色猶作當時夢寐中

紫綬金章白玉珂風流誰柰使君何文雄剩欲誇天寶
句好寧甘壓永和大斗十千傾綠蟻崇臺二八貯青蛾
名園一別空回首滿眼霜稜折艾荷

宿世含毫自右軍池頭秋色照鵝羣吳中驟貴烏絲紙
海內爭傳白練裙片石差栽枯樹賦

次公家有褚河南枯樹賦刻石

千

金零落送梨文

次公入覲都下有以大令送梨帖來售即傾五十金易之才七字云

空餘

太極臺前榜大筆高懸駐彩雲

三年移疾住吳閭不改清齋舊太常豈謂龍蛇能作讖
坐令鴻雁不成行遊同兜率非天姥秩主遮須勝夜郎
猶憶向來尊酒興亂山風雪灞橋傍

總角攜書到上林華筵何處不招尋淮南桂樹枝枝賦
薊北梅花片片吟斜日劒鋒雙黯淡暮年書札半浮沉
鍾期一去絃堪絕碎折床頭叔夜琴

張仲立過訪舟中邀集新居奉贈二律

修竹千竿蔽草廬蓬蒿一徑共躊躇囊傾記室三都外

張景陽注
左三都賦

架插司空萬卷餘茂苑祥光迴鸞鷟吳門秋

色到鱸魚他年孝友知侯在底用尋源上玉除

其二

是日適與仲立慕故用張玄事青
錢并鸞鷟並文成事浮家志和事

青錢萬選世誰倫金鏡千秋動紫宸三篋當年窮宇宙

七車遙夜辨星辰枰空淝水知無敵劒合延津自有神

倘許孝廉船上約浮家何惜去來頻

仲立博核羣書二
詩每篇八句用一

張氏事存之
以備此體

贈幼文幼文丁氏逸季侍童也常置帳中余從
諸客徂伺得之賞其丰神瑩徹為賦二首

八幕何來傅粉郎居然容色似龍陽書裙是日逢王令
大令為羊欣書
白練時欣方幼斷袖當年憶漢皇曲裡含桃歌韎韐車

前名果擲琳瑯異時開府能相過莫遣才人坐別床
庾信

事見
北史

秋水為神隔絳紗何年捧劍入王家床頭夢有金莖露
庭後春生玉樹花才比郗郎偏有意色同彌子更無瑕

他時倩汝汾陽宅飛挾紅綃上太霞

唐棟劍見
小說

為房仲贈姬人時齋素獨居一室

盡拋鉛粉著袈裟長日焚香誦法華不學楊枝辭白傅
暫同桃葉住王家臺深弄玉鸞簫斷殿鎖飛瓊鶴馭遐
自是蓮花離火宅子猷狂興為誰賒

答贈戚山人不磷不磷工繪事及詩寓逸季所
飄然孤鶴下玄關十日高陽共破顏白苧霜華婁子國
青繒雲色敬亭山囊中毛遂人爭識廡下梁鴻客未還

慙愧五君勞入頌風塵吾已髻毛斑

戚投余詩有見說五君無爾敵之句

贈王孟嘉弇州公從孫也

弇山堂下一逢君
玉樹翩翩自不羣
馬埒謾呼狂武子
龍山寧學醉參軍
朱絃暫習南風操
玉劒行衝北斗文
最憶竹林深夜語
亂星殘月坐宵分

壽王公詹七秩

瑯琊門第舊稱雄
握手翩翩大令風
函谷雲霞新紫氣
燕臺日月舊青宮
竹枝賦就徵才子
桃葉歌成教短童

聞道瑤池開燕日萬花如綉簇簾櫳

再輓王長公二十首

有序

余既為長公輓章二百四十韻矣顧鄙懷猶有未釋然者憶曩哭次公賦七言律十六章長公讀之數過因戲謂古今哀挽之什至子多乎哉第辭竭思枯即異時吾不諱何以措手余亦戲荅方公為魯靈光砥柱百世僕以朝菌觀大椿雖欲有言得乎長公目余一咲

耳音泠泠誠不意鸞駉鶴馭倏忽昇於大羅
也追惟宿諾勉爾含毫呻吟一夕成二十章
於乎伯牙絃絕江淹才盡余此後亦永謝筆
研矣

絳節初昇上帝朝清都何處問岵堯龍歸大壑乾坤暮
鳳返高岡日月遙文字八荒傳袞冕詩篇六合誦簫韶
莫言名世期終在永劫人才付寂寥

遙夜青鸞帝闕來驟看黃鶴向蓬萊三車詎載平生業

八斗難名間世才
心折班揚愁擗管
汗流枚馬避登臺
風流咫尺人寰盡
慟絕瑯琊玉樹摧

萬象文光燭海濶
蚤聞名姓動華夷
雄飛宇宙三千劫
獨應貞元五百期
龍去南陽高士遠
麟歸東路哲人遲
生芻泣奠婁江下
不為楊朱感路岐

一謫長庚茂苑前
紅光白日照奎躔
詞華盡挈三唐調
文管兼操十代權
夷貊盡傳鸚鵡賦
兒童能誦鷓鴣篇
亦知上帝頻前席
白玉樓中萬景懸

長公有鸚鵡賦鷓鴣詩並見集中故

借襦衡

鄭谷事

四部書成興未窮
名山隨處勒崆峒
開函再覩三墳出
列架渾疑二藏同
大業龍門卑馬史
竒文虎觀陋揚雄
平生謬作談玄客
寂寞侯芭鬢已蓬

三十年來上將壇
平將赤幟樹狂瀾
山頽泰岱千峰失
海涸崑崙萬谷殘
素旄翩躚來大鳥
丹臺遊戲挾飛鸞
便應瓢笠相尋去
靈藥何由借羽翰

躡履頻年到海涯
青童環珮結飛霞
毫端巨壑翻雲夢

研底春濤漲若耶庚子日斜驚鵬鳥戊辰年遠怪龍蛇

憑誰更發山陰興腸斷王猷一棹遐

公有戊辰三郡稿

弱冠中原結駟行朝陽爭覩鳳皇鳴朱絃萬古迴長夜
彩筆三朝擅大名座上雪花凌楚澤壚頭虹色貫秦城
為知兜率迎新帝不向遮須問舊盟

粲爛雙鉤倚鹿盧人倫一代擅風胡刪詩秩繼周司寇
作賦名高楚大夫閎閱五朝傳父老門墻四海見生徒
尋仙政有青蓮癖日候長鯨返太湖

三篋曾誇暗誦能七車今代幾同乘金泥籙辯神仙窟

玉鑑文窺帝子陵海上專車無巨骨山中著械有奇形

干將一夜飛雷煥服匿何年問陸沉

請厄言附錄作用
張寬安世嵇康江

淹防風貳
負等八事

十載玄關閉綠蘿一朝禪榻蛻維摩金棺掣電飛西竺

玉舄搏風上大羅丹闕授書偕素女絳臺攜藻侍皇娥

青天度索山頭望試問桃花發幾何

皇娥歌見
拾遺記

七雋翩翩聚紫宸陳思才調擬誰倫華陽館內飛談日

碣石宮前鬪賦晨白壁千秋無大楚黃金一字有先秦
參差王氣東南歇悵望遙天絕後塵

奕葉瓊枝照錦袍何人不羨二王豪爭傳一帖辭中令
忽報孤琴逝馬曹大地驂騑紛蹀躞中天麟鳳並遊遨
雲漿萬斛西池上好憶金華濺露桃

雙旌曾駐白公堤夾岼桃花送馬蹄大筆今懸婁水上
高門元峙越臺西兩高岩壑爭奇句三竺雲嵐護舊題

陳迹諸王何處問亂山嚴瀨夕陽低

婁江之王實吾越
睦州分水自國初

徒吳今尚
同譜系云

棘闌綿上舊躊躇彩筆寧論晉問如汾水真儒羅上第
晉陽精甲候前除千峰曙日褰帷外百谷晴嵐眺望餘

翹首太行雲霧色幾回梁國為停輿

長公庚午校士山西程式咸出其手

尋以內
艱歸

一疏東南臥草亭自將遊屐臥沉冥丹霞蔽日攀林屋
白露橫天汎洞庭角里攜家迷故蹟靈威入穴辯遺銘

泠然一夢乘風去悵望吳峰立翠屏

長公有陽羨洞庭諸遊稿

尚思斧鉞駐鄖關開府中丞節制閒萬馬不嘶雲夢澤

孤鴻時達洞庭灣

用柳毅事長公嘗開府鄖陽云

朱絃夜和湘靈瑟白

亭秋紉漢女環極目招魂勞楚夢三閭能復戀人寰

白門花月漫撩吟可柰蒲輪歷歲尋一曲五湖頻入夢

三生八座詎縈心風摧玉軫高山絕露掩金刀大壑沉

信有騎曹清癖在仇池新竹漸成林

臺殿金銀挂夕陽婁江百畝暫徜徉全收五岳壺天內

別起三山陸海旁堂上涼風生綠堦亭前奇石護滄浪

奔園有涼風堂蘇子美
滄浪亭在吳門僅百里
祇今誰主花溪宅萬朵芙蓉泣

露房

短髮飄蕭大海頭登龍曾是昔年遊
長裾晚曳三千隊彩袖朝傾十二樓
字挾風雲心未老名懸日月望難酬
無勞動色真長問已盡人間第一流

長公舊贈余詩云一字風雲爭吐氣

千秋日月破藏名又云代興天地有詞壇國士誰能不讓韓俱非余所敢任云

抵新安訪汪司馬伯玉八首

疊浪奔流大壑摧龍門咫尺擬蓬萊
三千界迥乘風入

卷五十六
四百灘長挂雪來隘地黃山無俗轍中天白岳有仙臺
躋攀一快平生目肯作咸陽十日迴

匣底青萍煥陸離酬知今日愧前期三朝詞賦羣公盡
一代文章大老遺宇內高名譁北斗壚頭陳迹悵南皮
關情最是婁江色萬樹桃花落海湄

紫氣新都間白雲關前晴色望綢緡誰家片碣無題字
到處名山候勒文亭倚太玄空八代囊攜副墨象三墳
何言吉甫偏能頌手繫樓蘭興水濱

當年橫槊氣如虹，戰血猶殷大海紅。
七澤戈鋌移小隊，三河鐃吹候元戎。
營中賦客袁宏俊，幕下詩流杜甫雄。
拂袖麒麟成往事，亂山雲色臥空同。

十載東山挂夢魂，歸從西竺問乾坤。
孤悰自寄函三室，大法遙探不二門。
香積飯僧忘歲月，菩提叅佛悟晨昏。
猶餘慧業差縈念，尺寸毫端萬古論。

藝苑宗盟四十年，暮途真契少林禪。
雲扶砥柱千秋壯，日揭靈光萬古懸。
虎帳韜鈴聊偃息，雞林詞筆競流傳。

無論片諾登龍易大雅堂深列管絃

司馬有傳奇四卷
名大雅堂集世方

行盛

當年懷刺出菰蘆傾蓋錢塘月滿途綺席衣冠連北海
畫船簫鼓出西湖
葵皇麗句懸金剝爛漫清歌送玉壺
雙劍只今猶賦草擅場能憶橋生無

五子當年迹已陳
竹林攜手重傷神
齊驅碣石無先輩
學步邯鄲媿後塵
海內誰當司馬客
山中今見牧羊人
惟應乞取朝元訣
坐嘯天都望玉宸

抵太函適汪司馬赴許將軍泛舟余遂為不速
之客座中分賦

暖日暄風照畫船茂林修竹聚羣賢
雙旌乍識元戎隊
片刺忻同上客筵
邂逅洪都無彩筆
賡酬郢國盡朱絃
歸來更下函中榻
千樹梅花伴獨眠

司馬公邀同謝少廉吳太寧集函中

萬山迴合太玄亭
五夜雄談入杳冥
繞座春風凌白苧
當筵牛斗落青萍
抽毫客似登梁苑
張樂人疑在洞庭

醉擁如花明月下路歧何用嘆飄零

是夕遂宿太函

金碧檐楹護翠嵐鬱葱雲霧繞東南頻年司馬懸高榻
此夕元龍臥太函古檜飛霜盤絕壑踈梅翹雪點空潭
水晶簾外千家月細酌天池佐夜談

董使君過訪賦贈二首

朱顏攜策赴長楊笑揖花驄大道傍赫煇封章馳紫殿
飛揚名譽出黃堂新都日月三天近夢澤雲烟一水長

回首竹林成舊迹
壚頭猶記阿咸狂

天人三策向來傳
萬室爭誇太守賢
夢繞花驄長樂外
風行竹馬大鄣前
朱樓畫閣灘聲近
紫殿琳宮岳色懸
爛漫黃金雙闕下
蚤攜繁露入甘泉

送汪象武之南都

祖帳天都樹色重
懸腰長鋏動芙蓉
遊梁上客傳司馬
入洛羣英艷士龍
五夜桃花朱桁落
三春楊柳白門逢
飛鴻咫尺平安報
奕葉泥金瑞氣濃

象武汪先生仲子
故有司馬士龍之

句

少室山房集卷五十六

欽定四庫全書

少室山房集卷五十七

明 胡應麟 撰

七言律詩七十六首

聶水部報命北上訂余握手谿頭賦此為別

河梁揮袂惜追遊
五夜雙龍拆斗牛
皂蓋欲飛燕闕底
青帆仍遡越溪頭
熒煌御氣瞻華袞
慷慨窮交惜敝裘
明月梅花春事蚤
為公懸榻在南樓

憶蘇別駕以修

有序

憶在清源日與惟效使君以修別駕沈飲十
旬極人生聚首之樂一別五載使君出守三
衢尚獲談謔朝暮以修歸卧巴蜀遂絕無鱗
羽相聞惟是使君擢任觀察以修實其州民
焉豈龍劍有靈天作之合乎余既悲使君之
行而又竊幸以修之遇感懷戀別情溢乎詞
笑憶清源市上年沈酣長伴酒家眠空傳剡曲三冬棹

竟阻咸陽十日筵，擯鼻正窮司馬賦。貂璫誰達子雲玄，
花驄此際堪攜興。極目雙鱗灩澦前。

題徐納言具慶貤封冊

壽域雙開越水頭，金章赫奕下龍樓。星飛南極晴光爛，
月湧西池瑞氣流。八百年方騎紫鳳，五千文欲駐青牛。
承家況是仙郎在，戲彩翩翩近玉旒。

登鹿鳴山絕頂憩小蓬萊觀易使君留題作

有序

山與郡城相望超然亭孤峙其顛四面無際

俯瞰衢闔萬瓦鱗次飛流百尺環抱其前吳
雲楚樹映帶左右近郭一大觀也舊止玄武
一祠葺而新之為游覽所寔始使君云

絕頂仙風面面來中天何異到蓬萊江流噴雪飛吳甸
石磴盤雲上越臺覽勝欲窮遊子目留題誰並使君才
舍毫驟發登高興莫訝銀鈎破綠苔

次日復攜酒酌山堂晴眺再題壁之左方

徙倚危峰散鹿羣尊前吳楚望細縕亭臺四壁全披霧

城郭千家半入雲
薄暮飛檣環浦下
中宵寒磬隔谿聞
青霞忽記觀棋約
曳杖行探玉笈文

贈李司理二首

有序

司理楚嘉魚人曾祖承箕舉于鄉棄弗上南
宮與陳公甫倡和嶺表即白沙集所稱李世
卿者也從弟承勛復以戰功列名臣文詞勲
德棣萼相望司理寔世其門閥尊人孝廉亦
有集行於時

環珮翩翩下玉除
漢庭司法定誰如
才名供奉騎鯨後
家世將軍射虎餘
座裏雄風迴七澤
囊中春雪照三衢
探竒不獨青霞興
物色時能到草廬

識面荊州更有無
頻將意氣傍菰蘆
青春紫殿誇陳策
綠鬢黃堂佐剖符
三尺清風懸水鏡
萬家明月浸冰壺
銅鞮況是山公在
把臂何妨學酒徒

壽喻封翁七秩

三生曾授大還丹
七紀長看住翠巒
座上雙龍隨舞雀

亭前五馬候驂鸞西江水接東溟近南極星朝北斗寒
莫道授書年尚少蒲輪行見出長安

張成叔過訪以尺牘詩草見投頗深推挹賦答

四章

意氣翩翩入洛才衡門游屐破蒼苔朱絃慘淡佳人絕
彩筆崢嶸大將來宇宙漸開新兔苑風雲重上舊燕臺
從知國士深難遇片諾何妨共草萊

十年塵迹嘆飄蓬傾蓋何由道路同一顧驥羣空北牡

雙飛龍劔隔雌雄名流上國交垂盡才子中原業未窮
悵望四明雲霧滿獨將離目送高鴻

片席乘風下海頭屋梁明月夢難酬尚虛文舉三年刺
誰共元龍百尺樓大業乾坤孤鳳起長途雨雪片鴻愁
京華舊識如相問老盡桐江釣客裘

粲爛鮫珠海色傍飛光遙夕遍茅堂千金易水看過市
片玉崑山總擅場白日鴻心游浩渺青天鵬翼破蒼茫
為君一誦如澠句齊晉他年可慙忘

歐楨伯八旬矣而神逾王千里餉書頗寓前薪
之憤寄答二章

老大登壇興轉豪懸書雨雪問綈袍文章得失寧兒輩
意氣縱橫尚我曹壯節轉深題柱感雄心曾怯據鞍勞
期君一在天風上信宿羅浮望海濤

十載西風嘆路岐荻蘆長卧越江湄宮殘碣石才人盡
殿聳靈光賦客遺斗酒乾坤迴骭髀尺書湖海問支離
奇峰四百飛雲外題遍梅花夜雪時

夜同孫金潘葉四生集文如美人館

繫馬高樓興未迴
銅瓶春色照寒梅
人同師利觀空坐
客似維摩抱病來
雪後何妨尋剎曲
雲深無處問陽臺
相逢肯下高唐榻
總為當年作賦才

張大來至泰和以翰貺見貽賦謝

鴻書遙下白綸巾
聞說題橋氣象新
賜履乍聞中禁側
鳴琴獨坐大江濱
蒹葭澌水孤蓬夜
桃李河陽萬室春
莫向龍頭嗟晚暮
翩翩八翼上平津

丁觀察以兩臺疏薦留住四明賦懷二律

千騎縱橫夾上游飛章推轂動宸旒
干旄舊識長城寄斧鉞重因大海留
玉局閑敲風滿座金尊長嘯月當樓
春晴試弄桓伊笛何限梅花越水頭

咫尺樓船號令新欣從帷幄覩詞人
關中久自推馮異河內今誰屬寇恂
溪擁越來清霧雨山橫秦望絕風塵
大揮椽筆成功暇修禊蘭亭正暮春

送易惟效觀察之蜀中同李司理作八首

粲爛除書漢闕來蜀天何處望蓬萊黃堂久擅分符績
烏府新推仗鉞才霧擁雙龍行劍閣雲隨一宦度琴臺
百花潭上題詩暇幾喚詞人共綠醅

熒煌簫鼓夾離筵處處棠陰拂畫船叱馭重看行棧日
觀棋猶憶爛柯年瞿塘急峽高牙外夔府孤城大纛前
滿目匡山雲霧色好憑遺碣問青蓮

憲節朝巡白帝宮千山行色望難窮城懸灩澦飛濤上
暑湧岷峨積雪中社稷關心龍劍紫鄉閭游目錦袍紅

極知河內追思切伏闕何由借寇公

彩筆西南見吏情風流何似在承明花香匝地文君肆
樹色浮天望帝城攬轡岷山千騎肅飛書瀘水百夷平
莫言玉壘堪長借翹首雙珂漢闕鳴

楚水巴山別思重經遊何地不奇踪黃金作客憐司馬

白羽談兵羨卧龍絕棧三千行蜀道危闌十二望巫峰

高唐賦罷堪攜手咫尺雲華夢裏逢

巫山神女號雲華
夫人見太平廣記

江城晴色照蒹葭彩鷁鳴榔散曙鴉鼓吹乘風還七澤

旌旗搖月上三巴揚雄閣畔題玄草杜甫堂前覓浣花
到日海棠開欲遍可能移植到山家

綠酒紅顏悵和歌金鑪銀燭奈愁何青羊肆遠孤旌駐
白馬寒江大舶過錦里春風啼蜀魄陽臺暮雨狎湘娥
雙魚是處能相憶極目遙天劍水波

歌罷驪駒散夕氛天涯何處悵離羣猿啼駱谷千峰雨
馬踏蠶叢萬岫雲大樹尚留嚴武碣小桃偏護薛濤墳

眉山伯仲銜知久唱和能令越客聞

謂蘇以修
伯仲也

題琴鶴重鳴卷

代送易使君

繡斧輝煌下越城
江天晴色耀飛旌
當年烏化雙鳬去
此日琴偕一鶴行
巫峽彩雲晨送客
巴山明月夜談兵
何煩更就成都卜
回首花驄向北平

春日送趙均甫敬甫二文學一之北庠一之南
雍秋試并寄懷大學士汝邁先生

畫船簫鼓發江潯
猶為離鴻一抱琴
彩日燕吳雙鳳下
青雲南北二龍吟
輝皇棣萼聯高闕
爛漫荆花簇上林

何事中朝論閎閎萬方翹首祝商霖

題陳玉叔天尺樓

宸章爛漫燭奎躔呼吸真看帝座懸閎閎九朝韋曲後
聲華三世杜陵前風雲仲舉方高步湖海元龍漫獨眠
翹首珮環紅日近好開東閣待如椽

李允達過訪賦贈

十年塵迹愧疎慵一刺何來倒屣逢文彩乍斑難隱豹
髭毛垂白為屠龍尊前片語江河盡筆底千秋海岱從

何限朝真諸洞色暮天凝望白雲重

早春汪司馬伯玉抵嚴陵以手札見招先此奉
東期司馬過小園時仲淹同至

踏盡名山興未迴一筇春首問崔嵬東華紫氣真人駐
西竺青蓮大士來絕壑魚龍迎繫纜中天鸞雀候登臺
千門雪色澄江上咫尺能無過草萊

雪中寄司馬汪公泊方山人劉文學

千峰寒色坐霏霏極目瑤華倚石扉八座暫回司馬駕

孤亭遙問釣魚磯
同雲匝地江華暝
密雪連空海樹微
莫道剡溪仍返棹
子猷狂興正橫飛

汪司馬偕龍博士登嚴陵賦雪寄訊

蕭森寒色照荻蘆
縹緲青山入畫圖
不為文星移海甸
能令春色遍江湖
千花桐瀨飛瑤瑟
萬樹蘭陵照玉壺
況是郢中才子集
賦成題寄茂園無

同徐茂吳集唐惟良蘭陰館

蘭陰攜手白雲平
湖海重追舊日盟
魏典乍傳中論在

楚詞曾賦大言成

用唐
勒事

千崖薜荔誰同往五畝蓬蒿任

獨行莫負習家池上燕爛燒銀燭照山城

王長公二郎君同補邑庠寄賀

六朝門第盛瑯琊五葉儒紳冠海涯
片玉蚤曾誇郗氏三珠仍見屬王家
雌雄出匣俱生霧伯仲當尊並瀉霞
屈指天閑掄上駟大蒐龍種向流沙

伯仲句用
三雅事

梁持伯內史過谿上夜談燕市舊遊感而有贈
握手無言意已消江干晴色此停撓
千年紫閣幽期在

萬里青門別夢遙掩還有心酬鹿豕巢林何事擬鷓鴣
塵埃漫憶東華日濁酒長歌劍影搖

寄喻邦相二首

時權觀
察山東

輝皇除目下蓬萊繡斧麟符擁上材攬轡東方千騎合
寨帷南國片鴻來樞趨日月宣尼廟叱咤風雲管仲臺
莫道臨淄能久住太微寒色正崔嵬

雙飛龍劍出天涯熒熒寒光射彩霞碧海樓臺環碣石
青山城郭抱瑯琊齊都按節民風變魯壁探書世代遐

底事徂徠看日上扶桑晴旭正當衙

張幼于悼亡作

十載青閨戒婦儀一朝環珮赴瑤池傷心孔雀孤鳴夜
照影文禽獨立時霜薄騎曹愁裏鬢月殘京兆畫時眉
自從巫峽雲歸後不向人間怨別離

壽王轉運八秩二首

代長公作轉運
元美從子也

紫綬金章照暮天斑衣玉樹間華筵八旬正值飛熊候
九折能忘駐馬年屨躡仙風陽羨頂船邀明月洞庭前

東山咫尺過從易歲歲看花共阿玄

南北驅馳髻未皤一身鹽鐵寄婆婆烏衣坐處官仍達
黃綬歸來客競過桃葉興將中今遠竹林年較仲容多
明朝倘赴安期約雙鳥同凌大海波

易計部過訪賦贈

輝皇鹵簿到蘭舟認是栽花舊易侯岸幘已更新氣象
彈冠猶問昔交游攜來梁父中天日望入江郎大海流
美酒頓澆愁頓釋不知行李駐山郵

答李允達秀才四首

風霜遙墜筆如椽有客論文自綺年八咏漫愁人代隔

千秋重覩帝京傳

來詩及隱侯八咏
賓王帝京諸篇事

乾坤寂寞華陽社

雨雪蹉跎澌水船莫訝中郎貪割炙于今國士定誰憐

濁酒蘭陵悵望頻如澠今覩代興人居然鵬賦追仙客

誰解麟經作素臣

允達業
春秋

雷雨延津誇合劍星河嚴瀨

照垂綸無論白首侯芭業八翼看君近紫宸

青眼橫承百尺樓尊前何物慰離愁丹山月老寒棲鳳

白石雲荒夜飯牛屬國才名猶奉使輕車勲業漫封侯
期君對挾飛鯨去小作人間汗漫游

消渴頻年寄茂園何人詞賦競中原花生曼倩三千牘
草就蒙莊十萬言梁父雲霞期望日崑崙星斗待窮源
蟪蛄一室猶堪共莫使清風隔晤言

史記稱莊周著
書十萬餘言

壽王司寇元美六秩四首

長公之初度也實前丙戌之歲今甲子一周
矣冥靈大椿以五百八千為春秋區區人間

世駒隙眇不足論矧長公身居赤城名首仙
籍即冥靈大椿亦小年耳而何有于一甲子
耶第遐齡億算此實兆基詎容無祝以虛大
慶輒賦四律代頌嘉辰海內蒼生當同此願

云爾

玉珮曾聞下帝都金丹此日兆懸弧千秋事業周司寇
六秩行藏衛大夫伯仲埴篲麟是友孫枝蘭桂鳳為雛
吳門乍夜麻姑到仙釀何妨醉百觚

紅顏紆玉上彤墀
執苑縱橫大將旗
萬古文章尊泰岱
三朝名譽蓋華夷
靈光突兀雲霞擁
兜率高寒日月遲
七十二峯元宅畔
從教鸞鶴醉中騎

安車迢遞出楓宸
側席明光問老臣
獨步詩名齊大雅
高懸文價重先秦
追隨霍馭三天客
出入龍門四海人
漫詫蓬萊雲色裏
西園臺殿盡金銀

曾從彌勒問三禪
更逐方平煉九還
寄迹乾坤中土外
飛身雲霧大羅前
桑弧想像庚寅日
花甲週迴乙酉年

莫笑騎羊人老去，
振衣常侍玉華筵。

送王次公入賀萬壽

履底山川遍七閩，
仍將金鏡入楓宸。
三為大國論文吏，
兩作中朝獻壽臣。
拄笏露華流紫殿，
稱觴霞色動青旻。
為知燕錫承明後，
首問華陽擊筑人。

祝山人將過白岳訪汪司馬，
即席賦并寄汪公。
四海蒼生卜謝安，
誰同司馬話登壇。
新安水似龍門出，
白岳山將泰岱看。
明月乍淹蘿徑曉，
西風遙灑薜衣寒。

亦知幸舍堪彈鋏曾否中林問鷓鴣

沈明府二親馳封寄賀

八咏當年詫妙才鳴琴南國暫徘徊
循良政績飛三殿撫字聲名動兩臺
單父雲當公解入河陽春傍訟庭迴
危樓百尺東陽近肯握如椽到草萊

新正懷喻邦相方余過雲間恍忽不及往晤擬
至都下握手復以病歸漫此奉寄

孰是攜書問帝都聊同捧檄向江湖
愁多總入三秋髻

病久那遵百折途赤日虹光龍劒杳青霄雲色鳳城孤
春風遠憶朝元客滿錫黃金醉玉壺

清源訪蘇別駕以修邀同蔡景明夜集

扶疎雙樹似禪堂綠酒銀瓶喚客嘗麗藻世傳蘇屬國
高名人識蔡中郎三峨雲霧揮毫落九曲溪山入話長
已擽平原留十日漫將離色賦河梁

同蔡觀察蘇別駕集張文學園亭分賦

闌干百尺暮雲流八面疎櫺瞰斗牛彩筆詞人紛入坐

青衫遊子獨登樓無論河朔千秋勝已過平原十日留
一笑驪駒魂自斷不堪明夜木蘭舟

應麟自髻中即辱大司空朱公賞識茲公將南
歸不勝戀戀謹再賦七言二章

刊木當年夏后才乞歸優詔下蓬萊黃河萬里崑崙靜
紫氣雙帆碣石來北海琴尊初寄傲東山杖屨暫徘徊
莫言五老雲松近斗色崢嶸照上台

十載謳歌扈聖君三朝出入冠人羣華夷並切姬公望

河洛長思大禹勤，賜履燕臺晨動色。
懸車廬岳暮生雲，猶憐越客干將在。
拂拭寒光射斗文。

同趙明府郭鴻臚遊洞岩山

石壁高盤澗道分，夕陽鐘磬坐來聞。
雲堆絕壑噓龍氣，霧擁危峰下鹿羣。
曳杖乍招叢桂侶，吹笙遙問大茅君。
移家咫尺堪忘世，那得鐘山更勒文。

大司馬張公秋日過訪溪上，余時留武林，不值。
抵舍後再往謁謝二首。

熊車遙度越王臺
駿骨仍慙漢殿迴
廿載登龍頻入夢
當時題鳳亦憐才
三峨雲氣飄蘿薜
五岳風期動草萊
翹首未央天咫尺
祇今東閣定誰開

交游七子氣凌雲
出入三朝帝眷勤
文武並傳周吉甫
詩書長誦郤中軍
風高秦望雙旌入
潮落錢塘萬弩聞
突兀南樓秋色裏
胡床能許坐宵分

送戚都督之嶺南二首

大府新移鎮粵臺
辭天白馬下蓬萊
三邊帳幕霜華淨

五嶺橐韃雪色來說劒荆高多俠士抽毫袁伏是奇材
征南漢將曾飛檄寧似元戎出手裁

絕徼重飛上將星揚旌伐鼓度滄溟長驅吏士過南粵
遠播聲威到北庭杜含杯千堠肅梅花吹笛亂山青
羅浮銅柱燕然石萬古何人並勒銘

秋日湖上奉訪汪司馬伯玉時仲淹仲嘉同至
十載龍門夢寐長披襟何意共錢塘軒車驟擁西湖畔
劍珮遙占北斗傍業就千秋陵左馬家攜二仲勝求羊

漫誇四百臨安寺遍勒新題向草堂

湖上逢王承父

溪上秋風罷舉盃湖頭白眼重登臺
槎汝自崑崙至躡履余仍少室迴
三尺劍花凌宇宙十年囊草秘風雷
惟應爛醉烏程下盡解鸛裘付綠醅

送唐別駕之虔州

蕪城初別鳳簫水國重過駟馬橋
共惜士元居小郡何如長孺在中朝
千林大庾含芳近萬葉唐昌入夢遙

便覺佩刀干氣象驛亭風雨夜來饒

送大司馬張公還朝四首

赤羽初銷萬竈烟朱旌重閃入朝年
鯨鯢觀築三吳外虎豹關清百越前
西北風雲馳劍履東南日月護樓船
莫誇定遠封時事一代殊勲太史傳

中天名岳降崔嵬望裏三娥雪色開
父老競傳司馬諭君王遙借卧龍才
長城乍起當周甸大海初澄傍越臺
縱是抽毫難和客幕中猶許孟堅來

氛侵天南逼大荒獨持雙斧到錢塘三年幕府蟠蛟蜃
一夜轅門縛虎狼淮蔡橐鞬爭伏謁朔方旗幟盡飛揚
賓僚漫擬從軍樂手定銑歌十八章

大纛生風入帝城雙龍遙夜雪花鳴餘皇十萬清吳塞
練組三千肅漢營淝水蒼生偏聽捷潢池赤子競輸誠
何人第一麒麟上彩筆詞場更主盟

王山人世周以長歌及七言二律見貽賦答二

首

旅食經秋傍越臺王郎瓢笠為誰來平收南國雙金價
自老崑岡片玉才俠氣爾仍標海岳詩名吾亦困塵埃
尋仙倘覓金華洞雙跨虬龍出草萊

王崑山人

客館逢君思欲狂吳山握手望錢塘寒光驟吐青萍匣
秋色先凋白苧裳老去雲霞忘世態窮來天地問詞場
漫將七子推同調不盡雄心驥櫪傍

中秋夜司馬汪公招同吳越諸名士湖上玩月
得秋字

縹緲晴烟一望收樓船明月大堤頭芙蓉花發重湖夜
桂樹香飄萬壑秋彩筆乾坤誰大雅青衫吳越盡名流
何當醉逐羣公去十二瑤臺次第遊

十六夜喻別駕邀同汪公重集俞園得池字

滿坐青山照習池上公攜客共含卮中天月色重圓夜
大海潮痕乍落時杖擲廣寒銀闕近盃傾河漢玉輪遲
當筵觸目俱名勝爛醉高陽白接羅

是夕邦相以公事先行余同司馬移舟六橋布

席堤上澄湖月色萬頃如畫簫管間作諸君
劇懽丙夜迺返

十里長橋跨水涯狂呼明月醉流霞平湖影落虹千丈
遠岫光飛雪萬家映席楓杉俱錦樹迴船葭莢半瑤華
洞庭秋色饒相似莫把雲門異代誇

陳觀察留飲賦贈

豪氣曾聞百尺樓重看下榻自南州雙懸斧鉞名
山色獨坐樓船大海流絕頂雲霞藏雁宕中天雷電挂龍湫

探奇不淺王郎興瓢笠能容次第遊

少室山房集卷五十七

欽定四庫全書

少室山房集卷五十八

明 胡應麟 撰

七言律詩八十首

七月望抵武林陸履素使君招集湖上樂人周
生瑾者年少善歌酒酣持扇索題即席塗抹
四韻

華星明月遍西園
皐蓋追隨識大藩
南國風流周小史

東吳才望陸平原朱絃度曲飛霜麗玉局觀棋墜露繁
夾岼芙蕖千萬朵歸來何異宿桃源

秋夜集程仲凱玉樹亭同梅太符羅高君作

珠簾十二鎖蘭苔一樹亭亭碎月搖貝葉恍疑天竺寺
瓊花如靚廣陵橋堦前秀色呈諸謝庭后新聲度六朝
最是縞衣明夕夢相思愁絕彩雲遙

雪錢太學懋毅過訪奉贈余懋毅年家子也

奕葉風流大雅堂飛揚才藻敵文房青鞋遍踏吳山下

阜帽頻敲越水傍賦就長楊迷國艷裁成叢桂發天香
東南彩筆錢郎舊名士今誰列雁行

寄贈龍君御校文南都便道入楚省覲

湖頭晴色罷參禪又覩風流白下年六館才人爭射策
三吳詞客候譚玄雲拖彩服椿庭外霧擁朱衣棘院前
莫戀長干風景麗西泠何限木蘭船

寄贈長洲江明府明府楚之桃源人

十載風期夢寐賒相逢何意驟天涯栽成林屋花千畝

恍入桃源樹萬家畫鷁秋分吳苑月飛鳬晴蹴漢宮霞
青旗夾岬休回首滿目河梁散曙鴉

舟過廣陵訪陸無從夜集託以買宅橋東因寄

贈此作

橋上相攜不厭頻鈿車油壁半香塵貧將玉樹誇詞客
老向瓊花作主人邗浦月華秋似練曲江濤色夜如銀
青樓肯著狂夫卧傳語吹簫為卜鄰

閏九月望後抵淮上包楫升水部邀集署中二

首有序

衙齋之傍雕欄曲池特擅華勝入夜登西臺
長空無雲皓魄如畫酒酣樂作小奚歌紅線
行巨觴豪飲劇談遂至申旦蓋余自癸酉之
歲以大中丞滕公命入武林與穉升及元采
立夫輩同學萬松精舍屈指二十四秋浮沈
異趣穉升故人之誼戀戀猶昔云

白面揚亭話草玄升沈迴首一潸然飛揚六傳浮淮日

潦倒單車入洛年
劒合青萍明月底
杯分黃菊暮雲前
投醪拚吸長河盡
可奈平原是別筵

雕欄十二淨無塵
綠酒銀燈勸客頻
持節汝為都水使
乘槎余是問津人
風生錦樹鳴霜葉
露洗瑤臺上月輪
莫訝秋宵談易徹
廿年朋輩各參辰

泊天津遇陳孝廉仁夫為十日飲賦贈

把袂飛揚易水頭
當年馳疏識名流
從軍自結三千客
破敵頻呼十萬侯
劒拂秋霜臨虎穴
毫揮春雪上龍樓

期君一在新豐市爛漫桃花撲錦裘

陳雅喜談兵欲以三十六人橫行日

本如班定遠故事

初入都與惟寅話舊白雪齋作

聚散升沈二十年一尊攜手暮雲懸
觀魚尚憶濠梁下
市駿重逢碣石前
意氣乾坤誰並許
頭顱霜雪競相憐
從知奕葉麒麟貴
彩筆何人載世傳

仲冬長至大學士趙公汝邁大將軍李惟寅同

日先後招飲賦謝二章

飛葭六琯動芳晨玳瑁筵開並帝臣長揖將軍元有客
掃門丞相詎無人黃雲絕塞開金甲紫霧中天護玉宸
不為上公雙吐哺荷衣容易到風塵

旅館陽迴雪乍晴梅花吹角暮雲平羹調上相長楊殿
酒出元戎細柳營鸛鷺三千隨玉陞熊羆十萬衛金城
酬知何限干將色夜夜雙龍匣底鳴

至日同俞孟武顧朗生朱汝修集李太保惟寅

白雪齋即席得來字

朱門遙喜一陽迴
曉逐春光上薊臺
隴右英豪元世業
淮南賓客盡時才
驅車豈為千秋出
擊筑重將萬感來
拚取深杯酬令節
參差銀漏滴蓬萊

次日再同俞劉朱三子集李汝藩齋中分得花
字

華堂燒燭散林鴉
坐擁紅爐片月斜
漸喜春光迴白苧
尚餘秋色對黃花
孤蓬游子衝殘雪
大筆才人照綺霞
莫訝金閨年少甚
岐陽詞賦舊名家

夜同孟弢諸子集白雪山房得雲字

畫戟清香上紫雲西園明月坐綢繆三年桂樹尊前別
一夜梅花笛裏聞白雪齋中人漸老黃金臺上客成羣
朝來太史占星聚燦爛干將易水濱

上元雪後過宋忠父八直不遇寄懷

縹緲天花散鶴羣瑤臺十二迴難分光搖火樹甘泉月
焰吐金蓮太液雲殿上攀龍文苑客壇前飛騎羽林軍
知君此夕高堂夢一賦晨看帝座聞

過王思延齋頭讀所撰新草并鈔本夷堅支志
十弓主人索七言一律及詩數三編為報即
以見歸走筆賦此

萬軸琳琅照五車天涯何意復吾廬登堂盡讀潛夫論

入幕先攜仲任書赤水頻年迴象罔

此書余向求未獲

丹鉛遙

夜校蟲魚

以鈔本多訛脫

從知錦被參軍業挾策重過大酉居

王時為京
營參戎

題帷幄元勛冊八首

為相國趙公賦

寧夏獻俘

十萬材官奏凱旋
天威如電掃祈連
窮追冒頓蕭關外
盡縛中行漢殿前
宿霧三河沈劔戟
新霜六郡洗戈鋌
金門咫尺瑤編就
何限殊勛太史傳

五載干城急上材
傳呼中令出蓬萊
長纓北繫名王去
大纛南俘叛將來
淨掃烽烟張掖郡
平銷雲霧赫連臺
誰論淮蔡功成易
為說元戎是姓裴

朝鮮復境

飛騎紛紜易水傍羽書題處筆如杠月支故主仍修貢
日本殘兵盡乞降鼙鼓漁陽空大磧戈船鴨綠靜長江
經綸黃閣真誰並一代凌烟照畫墻

清秋遼左陣雲寒伐鼓吹笳上將壇乍見嫖姚屯細柳
俄傳都護奪皋蘭千檣觸浪長鯨碎萬弩乘潮巨鯉殘
一望越裳天似洗大標銅柱報金鑾

關西告捷

一鼓居延萬甲馳風雷搖曳助塞旗天驕膽落犁庭夜

日逐魂銷度漠時朔雪頓隨騷裏淨陰風旋挾虎狼移
金城却問諸年少可解營平授策奇

露布風馳入紫宸何人第一畫麒麟雙旌出塞元飛將
一柱擎天自老臣突兀燕山銘處石縱橫遼海戰時塵

索駝千隊南驅夜不數周家白雉馴

時邊將獲
索駝千頭

日本祈封

巨筏連雲盡度遼紛紛乞命候封輶單于勞面思歸國
贊普輸心願入朝九塞軍容銷戰伐八方民力謝征徭

安危華夏看今日一騎何煩出渭橋

平明閭闔露華晞六服懷琛候紫薇島虜行成祈北面
蕃臣重譯到西飛清風絕塞塵沙淨赤日扶桑燧火微
從此禦戎傳廟略上公橫玉贊垂衣

日本使名
小西飛

雪中同胡孟弢諸君集宋忠父第分得歌字

朱樓百尺帝城阿策蹇東來問叵羅獻賦客當梁苑聚
尋詩人自灞橋過千門落絮銀為殿萬井飛花玉作河
寂寞郢中高唱後重將白雪擅新歌

薄暮雪霽改席小西園步縹緲臺玩月入清華
洞觀梅花復張樂堂中華燈火樹絲竹間作
丙夜擁爐小齋聽韓生琴與周生較奕達曙
再用韻賦之

春光遙逐片鴻過有酒寧論夜若何東市張燈雲氣早
西園飛蓋月明多孤亭草色叢青桂古洞花香翳綠蘿
十二金釵屏後滿競翻瑤瑟奏吳歌

雪中同王明府蔡儀曹集恒叔同卿宅

縹緲關河凍欲含
灞橋吟興正驂驔
千門雪照梁園賦
萬古天空碣石談
柳絮樓臺迷塞北
梅花籬落認江南
相逢盡是朱絃客
一奏陽春意未慙

翌日再同恒叔同卿集樾舍儀部第

攜手高齋散鶴羣
帝城春色漸細縕
金庭日月三都賦

恒叔有五岳游草

玉洞雲霞二酉文

稚舍自號二酉山人

雪霽爐烟紫樹

起風清暮響隔花聞
朝來共策黎眉去
折盡寒梅易水濱

奉壽大學士洪都張公四首

律轉洪鈞萬象移金莖承露出瑤池蓬弧已卜三千外
花甲才周六十期霧擁青牛來絳闕雲飄黃鵠下彤墀
憑高一望台垣色南斗中天正陸離

海屋籌增玳瑁筵東皇靈氣夜周旋三台拱極星辰上
八柱擎天日月前左馬文章鸞掖貴夔龍勲業鳳池傳
桃花漫憶西華外玉洞明霞萬樹懸

二百年鍾命世才垂紳端笏住蓬萊三神山外青鸞下

五老峰頭白鹿來中貴傳觴臨玉陛大官行饌出瑤臺
無論吉甫清風頌煥爛宸章屬上裁

赤舄雙瞻傍紫宸華夷誰不羨經綸安危一代徵王佐
侍從三朝識帝臣異日才名金騶裏當年形貌石麒麟
閒雲極目匡廬畔能憶玄亭問字人

公在南成均日余
出門下命賦閒雲

詩館

雪中陸使君過訪時大計初解嚴

千山飛雪灞陵橋策馬長安路未遥豈為魚鹽來上國

爭傳牛酒錫中朝，綈袍碣石交情古。

使君往與余邂逅長安，彈指遂三十。

戴

彩筆甘泉氣象饒，八百瑤樓春苑外。新詩隨處勒岩

峽。

贈吳翁升

握手新知更酒徒，由來奇偉擅菰蘆。星河靜日飄雄劍，

風雨殘宵擊唾壺。白玉堂中人在否？

翁升買一姬甚麗而早死，集感懷之。

作為山黛閣編

黃金臺上客來無異時，苔雪家能泛何用扁舟。

狎五湖。

夜同胡孟弢龍君超楊世叔三孝廉周陳二山
人集宋忠父第觀梅花繁英盛開芬郁殊絕
適侯萬二都尉在坐琳琅珠玉與花艷相映
發同集諸君應接不遑余傾賞丙夜幾欲醉
卧閣中作趙師雄羅浮夢矣歸賦一律似忠
父并博笑侯萬二君

姑射雙仙玉不如一尊花底鬪璠璣夢迴大庾繁霜外
吟斷孤山片月餘寂歷寒香飛枕簟玲瓏疎影出庭除

東風何處吹長笛極目江南舊草廬

區太史用孺過訪小飲

濁酒翻歌意氣長金門環珮暫徜徉詞臣煖借青綾被
倦客寒消白苧裳賦雪何人還郢里談天吾輩尚華陽
相看伏櫪同盟在未遣雄心阨太行

夜同子玉過用孺出荔枝酒轟飲至酣即席賦
爛漫名花壓酒卮主人留客鳳凰池何煩大白呼桑落
宛似輕紅擘荔枝把臂浮雲春盡日持螯明月夜闌時

莫教一騎華清笑腸斷當年杜牧之

送趙鹽鐵之維揚

燕山晴雪照宮袍車騎東方意氣豪臺上千金騏驎骨
池頭五色鳳凰毛深花揚子迷春渡遠樹蕪城落夜濤
二十四橋人似玉畫筵何處伴揮毫

送孟弢之沅中

東風帆色潞河漣無賴楊花舞別筵龍劍未收豐獄底
鮫珠猶泣洞庭前千人漫擬酬春雪一士何妨守太玄

庠士僅
二十人

此去長沙應計日受釐明主在甘泉

贈李大將軍二首

誰奪天山蓋世勲
登壇長缺動星文
隴西猿臂傳飛將
薊北麟臺屬冠軍
十萬瑯戈營似雪
三千珠履座如雲
猶憐射獵平原后
彩筆拈詩過夜分

金鎖花深醉玉壺
綠沈苔卧伴雕弧
爭傳都尉晨風曲
自寫將軍落照圖
轉戰頻年屯涿鹿
禽生遙夜出飛狐
長纓不道終郎懦
躍馬蕭關日未晡

李善
丹青

同賀伯闇集蘇叔大聽謝孫兩孺子歌曲作是
夕賀遂以獲雋歸

曲巷濃春到竹扉
羊求相過並忘機
尊前月似羅浮出
座上雲偏碣石飛
花院管絃流翠幄
棘垣燈火動朱衣
慈恩百尺青霄外
姓氏晨看徹帝畿

曾人倩春日移居招同諸君夜集余偶以他燕
不赴賦謝此章

韋曲西南大隱留
卜居春日近龍樓
金門詔許東方待

玉殿書將太乙讎
柳色甘泉移砌上
花香平樂過床頭
羣公正引揮毫興
愁絕青絲絆紫騮

奉贈大學士馮公

當年曾謁大馮君
阜蓋飛揚潑水濱
華國更傳中秘草
名家誰嗣太玄文
香浮赤鳥唐宮霧
燭引緋袍漢殿雲
解道鳳池霞色滿
餘波長借白鷗羣

夜過蔡弘父館中
呼盧戲贈時蔡將買妾長安
屈指新豐散酒徒
長燈明月暫呼盧
關東意氣慙吳質

洛下風流羨蔡謨翠縷同心金是屋青絲垂手玉為壺
曲江花事輸年少一載嬋娟向五湖

王文學以忠八十餘徒步入燕訪大學士趙公
而神明茂甚詩以壯之

五字新詩一釣綸攜將帝座問星辰聊行雪裏山陰道
肯逐風前洛下塵大厦萬間依梓里危樓百尺近楓宸
無嫌掃葉王生耄結襪猶能重相臣

送屠田叔之七閩

抗手春明話別離為君重賦七閩詩
官曹鹽鐵酬文學
佛寺金銀卧武夷
目斷紫騮紅杏苑
歌殘黃鳥綠楊枝
側生飽啖楓亭下
可忘京華識面時

應揮使招集坐中北樂侑觴賦謝

燕寢清香散鶴羣
玳筵霞色坐細縕
蹁躑舞袖花間出
嘹唳歌喉竹下聞
旅夢乍迴燕邸月
鄉心猶共越谿雲
憑高試望東南氣
燦爛明星拂劒文

錢參戎移任北平二首

飛將新移右北平度遼橫海舊知名珠弓射日千鷗避
玉帳連雲萬騎鳴羽檄畫馳平樂館銑歌春滿受降城
曾聞異日東征績半夜天山已結營

一劍凌空舞雪花雙旌搖日動龍蛇從來驃騎能憂國
未滅匈奴肯顧家首膺城邊吹篳篥燕支山下奏琵琶
大標銅柱祈連外第一凌烟摠浪誇

王通侯世叔以新刻詩草見貽卒業賦二首

奕葉金貂大海濱風流王謝舊無羣清標突兀麒麟畫

彩翰飛翔驚鷺文
勅勒歌成才冠世
燕然銘就氣凌雲
寧知逸少將軍貴
擲管千花拂練裙

年少登壇笑伏波
飛章雲錦粲明河
大揮隴右屯田疏
重製伊州出塞歌
謁帝華筵聞杖杜
懷人清興入藤蘿
翩翩白馬燕臺暮
頻許荆高挾筑過

寄李逸人李好談
長生別余入咸陽
自云將煉藥終南
與人世絕

黃河遙望盡飛沙
一別難尋漢水槎
白苧閒過韋曲柳

青萍狂狎杜陵花長生籙在顏終駐太乙丹成鬢未華
寄問旗亭耕種叟荒原曾熟邵平瓜

送鍾太學天毓歸越省其尊人觀察公

驪歌不斷夕陽樓又折黃花賦遠遊六館諸生驚翰墨
三河羣少羨風流朱衣上國誰青眼彩袖高堂正白頭
歸去若耶西子近絲韁煩為片雲留

奉贈大司徒蒲坂楊公二首

當年袍笏借南宮片刺曾勞答孔融世德摠傳靈八座

家聲遙羨四三公
芻飛絕塞軍儲盛
粟輓長淮帝眷雄
自媿銜知年少
日蒲梢憔悴太行東

三朝出入珮雙龍
四岳諏諮近九重
社稷勛勞周太宰
川原籌畫漢司農
朱旗代北邊烽靜
絳帳關西世澤濃
廿載長安聊再入
不禁風雨敝芙蓉

中秋夜大學士趙公招集待月賦謝

長廊秋色轉斜曛
握手平津上客羣
酒出天厨容並醉
羹調帝座許平分
黃金城闕籠香霧
白玉樓臺挂彩雲

酣醉莫辭過丙夜清輝蘿薜已紛紛

中秋先一夕同吳允兆周元父集宋西寧園亭

翫月申旦即席分賦得郊字

秋半園林易水郊
郇厨頻出大官肴
茆堂一葉霜華下
桂殿千花月色交
極目蟾蜍初展鏡
驚心烏鵲未安巢
清光儻為侯門駐
後夜重攜上客敲

秋日王太學行父招同顧朗哉顧靜父李叔操
李本建袁微之魏穎超汪明生王資敬集長

安西曲

碧瓦朱甍大道傍，招邀臺館尚華陽。
壚頭擊劍多燕俠，澤畔抽毫是楚狂。
露黯翠梧頻換色，風酣紅芰亂飛香。
疎簾清簟人間世，賭墅憑誰敵謝郎。

中秋後一夕蘇叔大招同汪公幹胡昌世區德
符攜尊步月西長安遇趙汝元兄弟痛飲達
曙

一尊星斗挂長空，良夜招攜桂樹叢。
玉鏡尚圓千里外，

瑤臺同望九霄中高林墜露驚棲鳥遠塞飛霜落斷鴻
廿載素娥成遠別天香零落廣寒宮

蔡立夫素不事麴蘖入都下忽以酒人名每一
舉觴輒酣暢累日夜乃醒醒則復呼酒酒已
復醉或至經月始復常自名連環飲得歌者
苗鳳時置屏障間相酬酢余甚高其風格戲
贈此章

擊筑燕臺興轉狂離騷讀罷思飛揚經時曲阜邀從事

盡日糟丘卧太常
帳裏玉簫傳鳳吹
筵前珠履集龍陽
竹林風致看垂盡
儻許頻過白面郎

何長卿至自南都
技益精絕賦贈此章

一擲千金散彩雲
愀然長嘯大江濱
生花驟入銀鈎夢
倒薤俄成玉筍文
帝命靈篇傳七緯
人誰奇字詒三墳
玄亭十載清吟斷
為汝重題白練裙

汪象先伯仲招遊城東阮姬館即席索詩題壁

間

落魄長安思轉豪，新聲同聽鬱輪袍。看花悞入林中竹，

姬阮姓故

採藥迷行洞口桃。

亦劉阮事

小玉橫釵頻擁髻，阿環持

硯伺揮毫。

妓名瓊瓊

酣歌剩發青蓮興，莫遣汪郎笑二毛。

汪象先復邀集阮氏明月樓

羸馬東郊不厭狂，坐攜豪興入平康。觀風上國來吳季，

坐中吳生善歌

待月前溪過阮郎。石上桃花迷對奕，壚頭竹葉

照飛觴。青衫漫濕潯陽泪，一曲琵琶萬恨忘。

長安秋暮

萬戶西風急暮砧錢塘秋色夢中尋毫端漫詫相如壁
橐裏誰操郭隗金長信宮寒雲漠漠華陽社遠日沈沈
登高且逐黃花醉遮莫霜華入鬢心

陳太史孟常過訪

環珮翩翩洛下逢越溪猶記舊芙蓉
瑤弧百中長懸虱寶劔雙飛欲化龍
載筆西清霞縹緲
讎書東觀日從容
高樓肯作陳登卧
大闢翹材傍九重

壽李惟寅五秩初度八首

紫氣清秋駐玉宸
蒼生華夏頌經綸
三千劫外懸弧客
五十年中仗鉞人
文彩聲名符鸞鷟
丹青圖像照麒麟
崧高突兀生申後
誰復成周詒降神

樓臺十二靜飛沙
帶礪山河柱國家
映日堦墀呈五葉

公以暮秋五月初度
越三日乃為重九

先霜籬菊綻三花
紛紜瑞鶴遊蓬

島蹀躞名駒聚渥洼
虎帳麟袍天北極
人生何處覓丹

砂

黃菊初開玳瑁筵
羣仙齊降大羅天
登龍預報重陽日

躍馬才過半百年北府聲歌傳出塞西堂名勝鬪凌烟
貂蟬肯挾元侯重五夜花生巨筆前

十萬材官大將旗安危南北髻毛知青萍錯落談兵夜
白羽飛揚誓衆時雁塞爭傳都尉曲雞林頻誦拾遺詩

李白亦拜左拾遺惟寅
新集名青蓮閣草故云

烽烟淨濯榆關外羸取天河作

酒池

廿載陰山懾大名天驕消息斷龍城長驅蜃鱷扶桑界
盡宿貔貅細柳營疎勒勛勞班定遠先零籌策趙營平

由來文武中朝憲一頌聊煩吉甫評

登壇才氣冠時髦橫槩風流擅彩毫喬梓家聲雙鳳躍

孫枝門望八龍豪

公諸孫正得八人

青油幕護淮山桂赤玉盤

行闥苑桃尚記少年裘馬事西園旬日醉葡萄

北海筵中醉未停南皮社裏嘆飄零青衫白壁聯燕市

余與惟寅嘗合所作詩為聯璧編

紫綬黃金厭漢庭宇宙同盟三十載

江河齊算八千齡赤松少俟功成候把袂驅羊入翠屏
海岳風期聚草萊江山文藻半莓苔獨看魯國靈光殿

長峙燕關碣石臺射虎縱橫當世略雕龍淪落異時才
朱絃久絕雲門調一為鍾期次第裁

送汪象先還歙中余將卜居秣陵象先訂余買
宅杏花村同以明歲秋晚

青萍長夜舞離筵綠綺猶將別路彈岼夾丹楓雲外寺
江鳴黃葉雨中船鄉心半咽驪駒外客夢孤飛雁陣前
攜手杏花原上約鳳凰臺月幾迴圓

同王行父吳允兆沈孺休李本建魏穎超汪明

生李叔操集惟寅宮保第得飛字

玳瑁筵開半褐衣，侯門猶憶故山薇。
當尊紫氣函關落，繞座青霞碣石飛。
客醉南樓秋浩渺，兵談北府夜霏微。
中天試望長庚色，燦爛晴光徹帝畿。

趙相國齋中芍藥盛開即席賦

春色長安尚未闌，平津西第近金鑾。
瓊林種就三珠樹，玉砌粧成七寶欄。
露浥朱唇霞競吐，風迴粉面月初團。
調羹況值台垣暇，百遍休辭大白殘。

同王水部蔡祠部袁儀部集高比部正父郎中

同賦兼送正父南還

時正父以恤刑暫歸南海

一騎遙衝雨色來金門曾念舊蒿萊
舍杯四座俱仙吏授簡三曹各賦才
紫氣豐城看射獄丹砂勾漏待登臺
春光倘憶成都客人日詩篇海上裁

再用前韻送正父


斜日蒼涼轉翠苔一樽秋色指蓬萊
西山林葉儀曹興

柳子厚有秋日遊西山詩
蔡柬兩君皆嘗為儀部郎

東閣梅花水部才

王君璧
水曹睨

秦庭仍舊邸金殘碣石豈空臺南征何限登臨句四百
峰頭取次裁



少室山房集卷五十八

欽定四庫全書

集部

少室山房集卷五十九

詳校官編修

臣

槐

侍讀臣孫球覆勘

總校官庶吉士臣何思鈞

校對官中書臣王鍾泰

謄錄監生臣熊濂

欽定四庫全書

少室山房集卷五十九

明 胡應麟 撰

七言律詩八十首

大司馬東明石公過訪奉贈二首

百萬良家白羽中
驅除南北羨雄風
坐收貔虎無雙策
誰擅麒麟第一功
帶礪河山新氣象
旂常社稷舊精忠
遙憐抗疏黃門日
折檻長留玉陸楓

三朝詞筆大如椽琬琰勛勞柱石前七尺安危懸宇宙
霍鉤離合動星躔陳兵鉅鹿登壇夜破敵盧龍出塞年
堪笑班生頭漸白欲將銘頌勒燕然

送羅浮陳山人

揮手元龍客思遐十年豪氣共天涯愁深白下三秋月
夢入朱明萬樹霞卧榻經年聞帝座支機何處問仙槎
樂遊原上飛霜色惆悵離心折暮笳

同胡孟弢張仲立過集李惟寅宋忠父作

欲綰相如賦倦遊歸心頻折大刀頭桃花一樹空含笑
柳葉千絲盡喚愁狂逐春風眠北里醉呼明月上南樓
應門莫怪齊竿拙挾瑟時能過五侯

雨中同行父元兆集惟寅第作

阜帽敲斜白苧袍尊前華髮漸蕭蕭西堂殘暑驅紈扇
南陌新涼上彩毫風度蛩聲油幕遠月分螢影畫牆高
從知隻字千秋在底事平原說四豪

夏日集大學士趙公齋中時羣從諸孫咸集

畫檻雕楹煥陸離雪桃李坐含卮天迴廣厦流雲入
地擁長廊夕照移繞砌蘭孫誇奕葉當筵花萼鬪連枝
朝來霖雨商岩足好奏南薰上赤墀

夜同謝友可集曾人倩新居分得臺字客罷復
對奕丙夜

深居贏得近蓬萊路轉黃金百尺臺入座風流垂拱客
登壇名譽建安才雙扉積翠西山墮四壁新涼上苑來
清簟畫簾爭奕罷坐攜明月向蒼苔

寄贈李參知

駐發中出示吳下名流詩帖甚都

突兀龍門重漢都誰從長揖望司徒
天邊紫霧飄熊軾日下紅雲抱轆轤
種就甘棠連百粵攜來玄草半三吳
胡床見說風流甚試問南樓月有無

為行父贈西曲薛生

誰挈名花到上林居然一笑謝千金
江天桃葉凌風渡水國蒹葭抱月吟
朱鳳半翹緣比翼翠蛾微斂為同心
白家長恨殊堪誦早拂東床侍玉琴

薛生以七夕初度故小字巧巧又清齋學佛復
有素素之稱行父拉余過曲中薛持箋索題

走筆賦此

名花移植近金鑾一朶能傾十二欄巧思正鍾天女夕

素肌長抱月娥寒清商管協河東鳳

薛于坐吹玉簫汪明生作白眼和之

絕類燕中瞽目彈琵琶者衆為之大嘯云

赤錦箋裁蜀郡鸞可但校書推學

士龍門飛將舊登壇

薛濤稱女校書仁貴以白袍顯素素于騎射甚精皆薛氏云

李本建招集薛館薛於弧矢最精挾彈尤稱絕

技是日縱觀許為李作長歌贈薛先賦此篇

曾伴天孫侍玉宸偷從太白下峨岷驚看絕代無雙質

解道登壇第一人

薛一見余即以此語相贈

翠袖彎弧長貫月青絲

馳轡不飛塵亦知八斗才華絕能復抽毫賦洛神

同謝友可集王行父館中

一尊長夜把蒲萄邂逅燕城貫錦袍彩翰舊飛三楚雪

青萍初濯九江濤銷沈往事迷雞肋歷落雄心擅蟹螯

驚座莫言狂態甚風流王謝總人豪

王行父入都以鵞鮓糟鮓葛簞等物見餉賦此
玄經曾授楚三閭賦就河東出草廬餽我正思衡岳雁
為君重食武昌魚蒼筠卷雪真無價素葛含風玉不如
漫向美人論識面十年竟夢倚璫璵

唐從事邀集酒樓觀女樂即席賦此送唐之歛
中

錦纜黃河憶共來輝煌袍笏下蓬萊風流暫借蓮花幕
意氣頻呼竹葉杯海上晝遊還越郡天涯春色遍秦臺

雙騶倘憩齊雲石為掃題名舊綠苔

同王行父集惟寅齋頭得來字

曲几疎櫺照綠苔高陽狂興逐人來即看談虎當今事

何減雕龍異日才座上彩毫仍楚澤門前珠履半燕臺

蛟螭剝落司空字猶記岫嶠絕頂裁

時出大禹
承帝碑

楊博士招飲館中

博士成都人舊
為長洲縣尹

白板雙扉護碧苔何人攜酒問奇來玄亭暫寄成都客
宣室初還洛下才座裏盃盤仍首藉宮前袍笏漸蓬萊

無論麋鹿姑蘇畔蚤逐飛黃上薊臺

仲夏初度惟寅為余舉觴話舊感懷賦謝此什

年少相逢結客場翩翩裘馬賦河梁風期肯逐朱顏盡
意氣偏偕白髮長閣上麒麟雲縹緲宮前鵲鵲月微茫
桑弧莫話男兒事縱目天山大樹傍

蔡穉舍招同王恒叔永叔雨集

繞架琳瑯四壁前翛然門巷似神仙風驅殘熱先開徑
雨送新涼驟入筵三俊聯翩飛宛洛一經憔悴卧幽燕

母嗟老眼風塵下賭墅猶能壓謝玄

同王太僕蔡祠部集永叔黃門館中

十日平原燕未空千秋河朔思偏雄
雙攜綵筆邀王粲一抱朱絃和蔡邕
太液輕陰迴驟雨甘泉殘照挾飛虹
淋漓大白休辭醉何限蘭心玉署中

周竅六招飲齋中

苜蓿空齋坐典墳居然野鶴在雞羣
前身宋玉偏能賦早歲陳思善屬文
絕頂匡廬捫墜雪深秋滕閣卧飛雲

何須更作如椽夢粲爛朱華鄴水濱

竄六臨川人

贈王吏部

江左高門舊不羣
垂紳端笏氣凌雲
千秋藻鑑山公疏
一代菁華吏部文
漏待明光天咫尺
香含長樂霧網緼
干將此夕堪延佇
何限飛虹易水濱

惟寅治第于甃石中得大禹岫嶠碑因函置壁

間賦此紀事是日同觀者王行父汪明生

十丈穹窿照海湄
玄圭猶憶告成時
不緣竒字中郎識

那得靈文大夏遺霧擁蛟鼉晴挂壁星攢科斗夜臨池
他年手勒燕然碣萬古銀鈎對陸離

贈京兆尹錢公

宦迹三朝舊建章風流習習滿維揚高門奕葉推王謝
大府聯翩接趙張謁帝競傳京兆尹入官曾記禮曹郎
燕臺百尺衙齋近燦爛黃金出尚方

贈答郭太史美命

縹緲蓬壺十二樓鏘金鳴玉扈宸旒客傳江夏無雙譽

人擬汾陽第一流
紫閣霞明螭陛底
青宮雲繞鳳池頭
遙憐後夜藜燈色
曳杖頻攜太乙遊

太史江
夏人

與君禹蘇文別且六載入都後忽聞以大計至
余喜極策蹇訪邸中君禹方病齒謝客躍起
擁褐對談丙夜各賦一章

金銀宮闕駕蓬萊
入覲歡聲漢使來
一自驪駒傳象郡
那知龍劍合燕臺
新書碧荔枝頭寄
麗賦紅蕉葉下栽
秉燭對談拚永夜
參差梁月墮莓苔

張中丞助父兩以書寄余余亦兩書寄助父而
皆不達郎君後之都下再得手札賦此奉酬
廿載梁園望目勤西風林葉轉紛紜浮沈殷羨書中字
明滅荆卿劍上文地盡中原惟片雪天長南國有飛雲
悲歌屠狗燕臺事寂寞年來未易聞

壽柳封君

紫氣東溟日夜懸瓊樓春色照華筵簪纓世襲河東後
綸綍新傳渭水前桂樹一株偏倚月桃花千度不知年

誰論五馬人生貴屈指青鸞絳闕傳

區太史用孺招同屠田叔胡孟弢曾人倩崔子

玉謝天章高正甫張孟竒夜集得霞字

青熒藜火隔窓紗咫尺瀛州路未遐執戟共誇中秘館
飛觴頻入近臣家毫端麗賦燕臺雪座上雄談碣石霞
不道羅浮天萬里玉堂清夜看梅花

秋日汝元招集城西李氏高嘯臺即席賦

百尺闌干掛斗牛千家簾幙淨高秋慈恩花竹深藏寺

太液芙蓉遠入樓檻外飛雲盤野鶴尊前斜日墮沙鷗
脫巾洗足俱成趣莫負平原十日游

惟寅偶中人言不佞復將南發去住之懷淒然
岐路漫成此章

虎將親提十萬師功成頻奏乞歸詞寧知巧貝生文錦
不信明珠溷素絲上將且開黃菊宴遊人先到赤松祠
飛霜夜發河橋舫愁絕乖龍入夢思

時值暮秋

別沈司空純父二首

津亭黃葉正紛紛不斷秋聲馬上聞
客子衣裝鴻雁隊元戎旗幟鸞鷟軍
攜歸海嶠猶春雪望入河梁幾暮雲
萬里孤舟三剎畔不堪重泊過宵分

何限飛霜易水頭木蘭舟楫暫夷猶
四愁是處羈平子八詠當年擅隱侯
羽扇論兵朝北塞胡床攜客夜南樓
誰言片月關山遠夜夜雙龍合斗牛

別李太保惟寅

一騎西風問故山淮南叢桂正堪攀
華筵首列三千坐

大廈長依十萬間，出塞功成遼海戍。
攜家秋盡洞庭灣，高牙突兀雲霄上。
清夢頻飛玉筍班。

別郭太史美命

午夜西風興式微，井門黃葉背人飛。
孤雲萬里還丹壑，列宿中天覲紫微。
異代漢庭談結襪，他年周鼎佐垂衣。
莫愁楚越音書斷，何限陽春落海圻。

別王文學行父並所知薛生

長嘯都門話草萊，驪駒猶傍夕陽裁。
新詩絕代王摩詰，

妙舞傾城薛夜來尺璧故應還楚嶠雙珠何日問秦臺
紗窓繡幙論心地飛夢時能到綠苔

次潞河少保趙公太保李公各遣人以綾錦追
遺賦謝

煥爛雙緘襲彩毫春風如拂潞河濤寒銷學士青綾被
艷借元戎赤錦袍范叔豈忘歸魏思蘇卿寧憚入秦勞
江干好伴羊裘客垂釣三山問六鰲

與行父別都門意殊戀戀抵潞水則象先尚未

發舟把臂驚訝雄飲決日言念行父再贈此

章

興盡西風策蹇驢河梁酬唱未全虛那知流水思君日

徐幹詩思君如流水

正值陽關送客餘

是日辰別行父夕過象先陽關王維詩也

中斷

雁行仍比翼雙緘魚腹互傳書

行父象先彼此致書問訊互以不佞為言

由

來象緯占離合遮莫寒光射玉除

潞河南發永叔黃門虛所乘舟以見待賦謝二

章

北上青冥問紫宸東歸滄海話垂綸那知錦纜登仙客
猶戀綈袍謁帝人萬里長風吹浪日千山晴雪渡江晨
豪遊是處堪河朔底事平原話浹旬

攜手雙星散玉函故人憔悴百花潭多情落日停絲竿
無恙西風入布帆大澤魚龍天上下清溪鳬雁地東南
聯艫且角新題句何限江楓逐夜談

永叔舟中同王山人石父較奕作

天末歸心墮釣綸青鞋能復戀紅塵仙槎此夜偕王質

旅店何年卧積薪滿座星辰寒照客半窓風雨夜留人

無論甲子須臾事筆底桃花萬樹春

夷經有半
軒風雨集

次夕飲酣永叔得句云柝聲頻入夜霜寒余為

足成一律時仲子弼侍坐而余于司空為年

家

柝聲頻入亂霜寒燈燼交飛片月殘詞賦千秋攜玉樹
風期三世見金蘭寧親海甸驅馳急送客河橋去住難
迴首爛柯吾舊宅石門天際候青鸞

林計部天迪招飲達曙作時舟次清源關下

華館邀賓駐玉驄
當筵霞色照新豐
西園公子留明月
東海詞人擅大風
十道帆檣飛輓外
千門絃管嘯吟中
匆匆把袂南州去
腸斷清源驛路楓

天迪宗伯公子也

是夕伶人奏劇客有以救蛇獲報者戲于席上
賦此呈林君

千帆晴色下高舂
錦席華鑣夜過從
塵榻久懸徐孺子
角巾長墊郭林宗
青雲是處披文豹
紫霧何年化白龍

愁絕吳楓江路遠飛霜寒徹曙天鐘

天迪以新詩屬序未及脫稿賦此報之

青藜遙夜並過從白恰聊將對曼容一遇仙郎慚倚馬
從知詞客擅雕龍丹霞恍忽閩山駐紫氣蒼茫岱岳重
遍讀新詩三百首江天何處覓芙蓉

雪中再作此呈永叔

疊鼓嚴鉦報曙雞關河寒色望淒淒飄搖落絮縈高坻
綽約飛花罩大堤鶴氅乘風天上下漁竿橫霧月東西

蘭芽暮茁休相咲玉樹王家遍舊蹊

舟次清河逢王世叔通侯先是惟寅以尺素貽

世叔至是遇于途中二律奉贈

大纛高牙鎮海濱山河帶礪漢元勛
旌旗汗泗千艘合
簫鼓淮徐萬舶聞
開府世傳嚴僕射
輕裘人識杜將軍
翩翩白馬平原外
時見雙雕落彩雲

征西勛烈冠雲臺奕世威名被草萊
十道軍儲橫海節
三朝人望伏波才
搏風白鵲飛旌度
噴雪黃龍巨艦來

後夜南樓豪興發新詩何限月中裁

永叔舟中遇稚升水部再東二首

聲名藉藉動皇畿錦纜牙樯出海圻萬鷁連雲金翅擁
雙龍橫霧玉鱗飛淹留彩筆歌叢桂落青衫問采薇
同學廿年年少友幾人袍笏到丹扉

雙旌寒拂大河東舸艦如雲節制雄十載詩名傳水部
一時才望重山公風清邗浦梅花句月朗淮堤桂樹叢
咫尺牙璋龍闕畔金緋懸錫大司空

贈王中叔別駕二首

中叔為永叔伯兄次圭叔與余同鄉薦三君並掄魁

移官何啻入蓬瀛
矯矯朱霞麗赤城
荀氏一龍誇首占
薛家三鳳羨偕鳴
江天樓閣金陵壯
海岫帆檣鐵甕明
聞道畫簾清興劇
欲將藜火較楸枰

名家曾識晉司空
佐郡重看借大馮
岫幘光陰詩卷外
褰帷名勝畫圖中
西江楚蜀帆交下
鐵甕金焦寺對雄
屈指中朝優詔下
肯令神足限追風

入武林寓沈材叔園亭作

行李蕭蕭倦客囊
衣襟憔悴北來霜
花陰忽睹揚雄宅
草色重開杜甫堂
剡遠盡流青嶂色
簾疎長浸碧湖光
亦知八咏才情富
曾許風期在末行

曾方伯過訪寓中奉贈

婺水分符接畫橈
聲名八咏共岧峣
縱橫彩筆留三洞
爛熳雙旌駐六橋
擁霧薇花燕闕近
參天棠樹越城遙
酬知未和休文曲
獨把干將劒色搖

再柬陸履素使君

矯首湖天望日長
畫船簫鼓出錢塘
東京驟貴桓寬論
南越都忘陸賈裝
幕下清霜流彩筆
樓頭明月據胡床
芙蓉萬朶沈酣夜
曾憶當年共酒狂

陸使君過訪作

門巷蕭蕭閉綠苔
高牙俄報使君來
驚心雨雪違燕市
把臂星辰聚越臺
寂寞玄經沈草莽
飛揚丹詔出蓬萊
春花四百湖頭寺
彩筆將因次第裁

少室山房集卷五十九